

每週經課朗誦經文(巴克禮漢羅/教羅)2015/10/18

共同經課 - 1

約伯記三十八章一節~七節、三十四節~四十一節

1 Hit 時耶和華 tùi 大風 ê 中間應約伯講，2 Taⁿ 一個用無知 ê 話，hō 所議論 ê 無明，是 chī-chūi ah? 3 你 tiòh hà 腰親像大丈夫，我問你，你應我。4 我 hē 地 ê 地基，hit 時你 tī toh 落? 你若知影就講伊。5 Chī-chūi 定 tiòh 伊 ê 寸尺，chī-chūi 牽準索 tī 伊 ê 頂面，你知 mah? 6 伊 ê 地基 chhāi tī 甚麼 ê 頂面? á 是伊角頭 ê 石，chī-chūi 安置 ah? 7 當 hit 時，天光早 ê 星相 kap 唱歌；上帝 ê 眾 kiáⁿ 也 lóng 出歡喜 ê 聲。34 你能出聲叫雲，hō 兩水 choē-choē 遮蓋你 mah? 35 你能發出 sih-nà，in 就去，對你講，阮 tī chia。36 Chī-chūi 用智慧 hē tī 內面? Chī-chūi 賞賜聰明 tī 心內? 37 Chī-chūi 能用智慧算雲 ê 數額? Chī-chūi 能 piàⁿ 天 ê 盆; 38 hit 時塵埃成做土糜，土就結 kui-thng? 39 你有 kā 母 ê 獅 lāk-tiòh 食物? hō 獅 á-thùn 食飽 mah? 40 就是伊 tī 穴內撐腳，tī 隱密 ê 所在 bih-teh ê 時。41 烏鴉 kiáⁿ ñg 上帝哀求；無 thang 食飛來飛去 ê 時，chī-chūi 為烏鴉備辦食物 ah?

共同經課 - 2

詩篇一百零四篇一節~九節、二十四節、三十五 c 節

1 我 ê 心神 ah，你 tiòh o-ló 耶和華。耶和華我 ê 上帝 ah，你是至大；你用尊榮威嚴做相來穿。2 你穿光明親像外衫；thí 開天親像帳幅。3 伊 tī 水中安置伊樓閣 ê 通楹，用雲做伊 ê 車，用風 ê 翼來行；4 用風做伊 ê 使者，用焰火做伊 ê 差用；5 將地 hē tī 伊 ê 地基頂，Hō 伊永永無搖 choah。6 你用深淵親像衣裳遮蓋地面；Chiah-ê 水淹過山嶺。7 你一下 hoah，水就緊緊走；你 ê 雷一下 tân，水就緊緊流；8 Chhèng 到山頭，落到山谷，歸 tī 你 kā in 定 tiòh ê 所在。9 你定 tiòh 界限 hō 水 boē 能 poáⁿ 過，無 koh tò-tng 來遮蓋地面。24 耶和華 ah，你所造 ê 怎樣 hiah choē! lóng 是你用智慧造成 ê；遍地滿滿你 ê 富有。35 我 ê 心神 ah，tiòh o-ló 耶和華；Lín tiòh o-ló 耶和華。

共同經課 - 3

希伯來書五章一節~十節

1 因為 tùi 人 ê 中間所揀 ê 祭司頭 lóng 是為 tiòh 人，tī 關係上帝 ê 事，來設立，thang 為 tiòh 罪過獻禮物 kap 祭祀。2 伊既然 hō 軟 chiáⁿ 所圍困，chiah 會體量 m̄ 知影 kap 失迷 ê 人；3 所以伊應該因為本身，親像因為百姓，為 tiòh 罪來獻祭。4 Koh chit-ê 尊貴，m̄ 是人家己取，只有 hō 上帝召 ê，親像亞倫一樣。5 親像 án-ni，基督亦 m̄ 是家己尊做祭司頭，就是 hit-ê 對伊講，你就是我 ê Kiáⁿ，我今 á 日生 lín ê。6 Tī 別位亦講，你永遠做祭司，照 Bék-ki-sé-tek ê 班列。7 基督 tī 伊 tiàm 肉體 ê 日，用出力喉叫，koh 流目屎，獻祈禱懇求 hō hit-ê 話救伊出死 ê，koh 因為伊 ê 敬虔得 tiòh 聽見，8 雖然做 Kiáⁿ，亦 tùi 所受 chiah-ê 苦難來學順服；9 已經成做完全，就做凡若順服伊 ê 人永遠 chín-求 ê 根源；10 hō 上帝 chheng 伊做祭司頭，照 Bék-ki-sé-teke 班列。

共同經課 - 4

馬可福音十章三十五節~四十五節

35 西庇太 ê Kiáⁿ 雅各 kap 約翰就近來 kā 伊講，先生 ah，見若阮所對你求 ê，ài 你 kā 阮行伊。36 伊就 kā in 講，Ài 我 kā lín 行甚麼 ah? 37 In kā 伊講，准阮 tī 你 ê 榮光，一個坐你 ê chiáⁿ-pêng，一個坐你 ê tò-pêng。38 但是耶穌 kā in 講，Lín 所求 ê，lín m̄ 知。我所 lim ê 杯，lín 會 lim mah? 我所受 ê 洗，lín 會受 mah? 39 In 講會。伊 kā in 講，我所 lim ê 杯，lín beh lim 伊，我所受 ê 洗，lín beh 受伊；40 總是坐我 ê chiáⁿ-pêng tò-pêng m̄ 是我會 thang hō 人，獨獨為 tiòh 甚麼人備辦 ê 就 hō 伊。41 十個學生聽見，就受氣雅各 kap 約翰。42 耶穌叫 in 來 kā in 講，Lín 知外邦所尊做人君 ê 做主來治理 in，in ê 大人管轄 in。43 獨獨 lín 中間 m̄ 是 án-ni；lín 中間 ài 做大 ê beh 做 lín ê 差用；44 lín 中間 ài 做頭 ê beh 做眾人 ê 奴僕。45 因為人子到 m̄ 是 beh 差用人，是 beh hō 人差用，koh 獻伊 ê 性命來贖回 choē-choē 人。